

Limometal sačuvao radna mjesta, na redu je povećanje proizvodnje

*Prilagodili se novim zahtjevima na tržištu, izvršili reorganizaciju poslova i okrenuli se traženju novih poslovnih partnera*

26/01/2021 Izvor: business-magazine.ba



Bh. ekonomija trpi velike gubitke usljed situacije sa koronavirusom, a sve je veći broj Bosanaca i Hercegovaca koji gube poslove i završavaju na biroima za zapošljavanje. Vlasnici i direktori kompanija prisiljeni su, nažalost, na masovna otpuštanja.

Da bi sačuvale radna mjesta, fabrike počinju praviti nove proizvode i osvajati nova tržišta. I pored velikih problema zbog aktuelne situacije, firma Limometal iz Cazina uspjela je da ne otpusti nijednog radnika.

– Mi smo se borili, a u 2021. godini ćemo nastaviti borbu za svako radno mjesto. Naravno da je to težak proces, ali ne želimo da niko od naših radnika ostane na ulici i bez mogućnosti da zaradi za svoju porodicu. Zbog toga smo se prilagodili novim zahtjevima na tržištu, izvršili reorganizaciju poslova i okrenuli se traženju novih poslovnih partnera. Zahvaljujući promjenama sredinom godine koje su dale rezultate, poslovanje u 2020. godinu smo završili na pozitivnoj nuli – kaže direktor Limometala Mensur Mulalić.

Prvi čovjek uspješne firme iz Cazina svjestan je da i u godini pred nama bh. ekonomiju očekuju isti problemi i izazovi.

– Dvije godine prije koronavirusa imali smo porast proizvodnje od 10% i to nam je cilj i u 2021. godini. I pored brojnih problema uspjeli smo kupiti nove mašine za limove i počeli proizvoditi nove proizvode, među kojima su garaže za bicikla – govori Mulalić.

Limometal se, inače, može pohvaliti bogatim portfoliom. Njegovi proizvodi se koriste u zemljama Bliskog Istoka, SAD-a, Južne Koreje i drugim. Zahvaljujući CE certifikatu proizvodnje prema svjetskim standardima, omogućena im je međunarodna saradnja. Dugoročne i kratkoročne saradnje uspostavili su sa firmama širom svijeta, poput Ecosystem Haus iz Južne Koreje, Keep Company iz Iraka, REMS Immobilien iz Njemačke, A-Group Austrija i druge. Izložbeni salon i prodaju imaju u Cazinu.